

曾國藩全集

啓功題



卷十五

日記五

◎清 曾國藩 著

曾國藩全集

卷十五 日記五

北京出版社

曾國藩全集 卷十五 日記五

同治七年

正月

初二日

早飯後清理文件。見客一次。出門拜客數十家，惟黃軍門及湖南會館一坐，午初歸。習字一張，閱蘇詩七古。坐見之客二次。中飯後，米利堅人蒲安臣來拜。本在京充公使五、六年，今將回國，皇上又派令至外國出使，與軍機章京志剛等同使英、法等國，將由上海來此一見，坐半時許。又立見之客一次，坐見者一次。閱本日文件，校對蘇詩七古十六頁。傍夕與紀澤一談。夜核批札稿簿，倦甚。二更後，溫《古文·傳誌類》。三點睡，五更醒，亦佳眠也。

初八日

是日恭逢祖考星岡公九十五冥壽，未及設祭。早飯後清理文件。旋見客，坐見者五次，立見者三次。習字一紙。又立見之客一次，坐見者三次。疲乏殊甚，懶於治事。圍棋二局。中飯後閱本日文件。又坐見之客一次。閱蘇詩七古數頁。申正後，體中

小覺不適，與紀澤兒久談。傍夕得家信，內有沅弟寄紀澤之信，字迹秀潤異常，當有後福。夜核批稿各簿，內批昭忠祠冊，沉吟最久。二更後寫信與沅弟。吾父於丙、丁兩年得四曾孫，當是人口蕃衍之象。吾兄弟當專意教育子孫，以期家聲不墜。

十二日

早飯後清理文件，習字一紙。坐見之客三次。圍棋二局。閱蘇詩七律五頁。午刻閱杜小舫等所擬江蘇水師營制事宜。午正請李質堂及司道等春酒，共三席，十五人，申初散。閱本日文件。阮文達之孫恩海送《雷塘盦主弟子記》，即文達之《年譜》也，閱數十頁。又坐見之客一次。夜核批稿各簿，又閱《阮文達年譜》。二更後與紀澤一談。辦年終密考單。四點睡，五更醒。

十六日

早飯後清理文件。見客，坐見者三次，立見者二次。習字一紙。圍棋二局。又見客二次，談甚久。閱蘇詩七律十頁。中飯後閱本日文件。坐見之客一次。寫紀鴻兒信一件，寫對聯四付。傍夕小坐。夜核批稿各簿，作片稿一件。湖北商賈龍燈入內，至後園一看。二更後閱白香山閑適古調。四點睡，四更末醒，旋復微寐。

廿二日

早飯後清理文件。坐見之客三次，立見者一次。習字一紙。圍棋二局。雨亭、省三來坐，久談。寫沅弟信一封，以新會陳氏所刻廿四史寄弟收藏。余本有兩部，兄弟分藏，俾子侄得以分看也。午正三刻至魁將軍處赴宴，酉正歸。閱本日文件。與子侄輩一談。夜核批稿各簿。二更後閱《唐宋詩醇》中之白香山詩。三點睡，雖醒過兩次，而是夕睡極酣美。

廿七日

早飯後清理文件。見客，坐見者一次，立見者二次。習字一紙。圍棋二局。蘇詩看畢，又看杜詩。余在京所抄十八家詩，惟杜、蘇二家最多，故先校核此二家，餘亦將次第校閱也。午刻，坐見之客三次。中飯後將《杜公年譜》閱一過，閱本日文件。申初寫橫披、直幅二件，約百八十字，寫對聯三付，寫扁字三十餘。傍夕至後園一覽。夜核批稿各簿。二更後將雪琴所咨水師補缺單一核。三點睡。

二月

初三日

早飯後清理文件，習字一紙。圍棋二局。閱校杜詩五七古十頁。坐見之客一次。午刻，張石朋帶來之揚州監生馬鑄，字蓉汀，善畫小照。余生平未畫過一次，因命之畫。馬與余對坐，張石朋與王子雲陪坐。約大半個時辰畫畢。持與家人，以爲頗肖也。中飯後閱本日文件。陰雨嚴寒，愁悶殊甚。寫沅弟信一件。申刻後即未治一事。傍夕坐睡片刻。夜核批稿各簿。二更後核信稿六件，核水師補缺一案事宜，清單尚未核畢。三點睡，不甚成寐。雨至黎明未息。自初二早至初四早，大雨兩日兩夜未少停止，深恐淫潦爲災，有傷歲事，憂繫無已。

初八日

早飯後清理文件。見客，坐見者三次，立見者一次。習字一紙。圍棋二局。又坐見之客四次，李小湖、雨亭兩次，談甚久。中飯後閱本日文件，批校杜詩三頁，寫對聯七付。至後園久覽。是日園中種竹，又於山上蓋一茅亭。因本日見客說話太多，即在園中散悶。夜核批稿各簿，核長江水師事宜一條，約三百餘字。二更三點睡，三更後

成寐。屢醒，不得酣眠。

十三日

早飯後清理文件。旋見客，坐見者二次，立見者二次。習字二紙。圍棋二局。又坐見之客二次。批校杜詩五律，至未正止，僅校十一頁。中飯後閱本日文件。申刻寫對聯九付。天氣奇冷，過於嚴冬。後園茅亭將蓋畢，屢次去看。傍夕小睡。夜核批稿各簿。二更，陳作梅、李幼泉來談。聞山東之兵在直隸敗潰，劉松山之勇疲極多逃者。楊鼎勛、郭松林之勇亦紛紛遁逃，不願渡黃。恐張總愚一股又將大振，憂灼無已！三點睡，尚能成寐。

十四日

早飯後清理文件，習字一紙。見客，坐見者三次。圍棋二局。批校杜詩五律十一頁。中飯後閱本日文件。李壬叔來久談，又與之圍棋二局。旋寫對聯四付、掛屏四張，約二百餘字。傍夕至後園茅亭一覽。夜核批稿各簿。三更後倦甚，默誦《詩經》。三點睡，三更後成寐，五更醒。

十九日

早飯後清理文件。與印渠、雪琴一談。習字一紙。旋坐見之客五次。圍棋二局。黃昌岐來一談。午刻將水師續定事宜核畢。留昌岐與印、雪等便飯。飯後閱本日文件，寫對聯四付、直幅一件，百餘字。又與印渠等一談。本日大雨，竟日夜不息。陰雨太久，深恐傷麥，焦灼之至。傍夕小坐。夜寫王靜庵、陳舫山各信一件，核本日批稿各簿。二更後閱梅伯言所選《古文辭略》。四點睡，四更三點醒。

廿五日

早飯後清理文件。見客，坐見者二次。習字一紙。圍棋二局。又坐見之客二次，立見者一次。批校杜詩十頁。五律校畢。中飯後坐見之客一次。出門拜丁雨生中丞，久談。旋又拜富副都統，酉初歸。閱本日文件。至幕府一談。傍夕小坐。夜核批稿各簿，寫沅弟信二頁，未畢。二更後溫《古文·傳誌類》中之《史記》。三點睡，尚能成寐。是日午後晴霽，麥稼或不大傷，深以爲慰。

廿八日

早飯後清理文件，習字一紙。圍棋二局。見客，坐見者五次。改信稿一件，批校

杜詩六頁。中飯後閱本日文件。丁雨生來久談。閱邸鈔。陳舫仙發新疆效力贖罪，深爲駭嘆！宦途嶮巇，良可危懼。而聞舫仙在防，私自反省。當賊匪渡黃之日，即該司到省之日，又未嘗無應得之罪也。添寫許仙屏信三頁。是日辰刻行禮，拜發萬壽本。申刻料理摺差進京信件。傍夕小坐。夜核批稿各簿，改劉省三信稿約五百字。二更四點睡。

三月

初二日

早飯後清理文件。見客，坐見者一次，立見者一次。習字一紙。圍棋二局。批校《韓詩》五頁。中飯，請杏生小酌，適唐煥章來，因請其人座，未正散。陳作梅來一談，又坐見之客一次。閱本日文件，寫對聯七付。天氣陰雨微寒，不似三月景象，深爲慮。身體亦覺蕭索頹散，不願治事。傍夕小睡。夜核批稿各簿。施擬改復總理衙門信稿。二更三點睡，尚未改及小半。竟夜大雨，寒如嚴冬。歲事可憂之至，不甚成寐。

初四日

早飯後清理文件。坐見之客一次。將總理衙門回信改畢，約三千字。習字一紙。

圍棋二局。批《韓詩》四頁。午正請兩山長及省三、曉蓮等小宴，酬其衡文之勞也，申刻散。旋閱本日文件，又批《韓詩》六頁。至後園與紀渠侄久談。夜核兩日之批稿簿，將水師補缺及各摺片清單核對一過，明日將發報也。二更後朗誦《古文·識度之屬》十餘首。四點睡。是日陰晴各半，凝寒如故。

初九日

早飯後清理文件。坐見之客一次。習字一紙。圍棋二局。批校《韓詩》十三頁。中飯後，坐見之客一次。閱本日文件。小睡片刻。核改信稿五件。傍夕至後園與陳杏生一談。鐘山之雲甚厚，本日雨多，麥已全壞，再不放晴，歲事將不可問，憂灼之至。夜核批稿各簿，二更後溫《古文·叙記類》。三點睡，尚能酣眠。

十一日

早飯後清理文件。見客，坐見者一次，立見者一次。習字一紙。圍棋二局。批校《韓詩》，五、七古及聯句校畢，律句則本未抄也。中飯後閱本日文件。觀邸鈔，有大不適於心者，鬱悶久之，坐睡片刻。申刻寫對聯七付。酉刻，坐見之客二次。至後園觀覽良久。是日天大晴明，麥稼或尚可救全幾分。夜核批札稿簿。二更後倦甚。旋閱

《周易》兩卦。三點睡，三更後成寐。

十三日

早飯後清理文件，習字一紙。坐見之客二次。圍棋二局。太白之詩見於郭茂倩《樂府詩集》者凡百有八篇。余將批校太白詩，因將目錄抄一遍。已正至後園亭中與蔡貞齋一談。午正，李雨亭來一談。中飯後閱本日文件。批校太白詩四頁。小睡片刻。申正寫對聯七付。旋核信稿一件，頗長。傍夕小睡。夜核批稿各簿，二更後溫《古文·情韻之屬》。三點睡，甚得酣眠。

十六日

早飯後清理文件，習字一紙。坐見之客二次。圍棋二局。又坐見之客二次，談頗久。批校《太白樂府》。中飯後閱本日文件。王子蕃來一談。旋至杏生處一談。又批校《太白集》。申正寫對聯四付，疲困殊甚，睡頗久。夜核批稿各簿。一二更後，將繆刻《太白樂府》與郭茂倩集一對。四點睡。是日陰雨，歲事殆不可問矣，憂嘆無已！

十八日

早飯後清理文件。坐見之客二次。習字一紙。圍棋二局。批校《太白樂府》，每日

僅校二十首或十餘首。蓋余於樂府向未用功，茲稍一措意，全無人處也。中飯後閱本日文件。九江稅務司康發達來見，又坐見之客一次。小睡片刻。申正寫對聯七付。旋核批稿各簿。至幕府一談。傍夕小睡。夜，將作《龍神廟碑》，翻閱各書，尚未下筆。二更四點睡，尚能成寐。是日上半年天大晴，至申酉間，變爲陰雨，傍夕又晴霽，初更時星月皎潔，二更後雷雨交作，風勢亦狂，夜深雨止，又見星月。黎明，朗月當空，又清明矣。

廿一日

早飯後清理文件。習字一紙。圍棋二局。坐見之客二次，立見者一次。批校太白詩十頁，未正畢。中飯後閱本日文件。至後園一覽。小睡片刻。申正寫對聯八付，核批稿各簿，核信稿一件。傍夕小睡。夜寫零字頗多，將《龍神廟記》再爲修改。二更後溫《古文·情韻之屬》。三點睡，尚能成寐，四更未醒。是日又雨，深以麥稼爲憂。

四月

初二日

早飯後清理文件。坐見之客一次，立見者三次。黎明步禱至城隍廟，卯正歸。習字一紙。圍棋二局。校白太傅《新樂府》。已正，南屏自湖南來，談最久，又坐見之客

一次。中飯後閱本日文件，再校《白香山樂府》。小睡片刻。至惠甫處與南屏一談。申刻寫對聯七付。天氣熱甚，至後園一覽。酉刻核批札簿，未畢。傍夕小睡。夜又核批稿簿，旋核信稿四件。二更三點睡，三更後成寐，五更醒。

初九日

早飯後，步行至城隍廟。因天氣清明，即行撤壇。禮畢，至汪梅村家一坐。歸，坐見之客二次，立見者一次。清理文件，習字一紙。圍棋二局。閱校黃山谷詩七古、七律二種。將任、史兩譜一閱，批校三頁許。午正請小泉小宴，黃昌岐、陳心泉等陪之，申初二刻散。閱本日文件。申正，李眉生來久談，陪至後園茅亭一坐。雨大，不能遽歸。傍夕歸，小睡。夜核批稿各簿。二更後閱吳南屏所著《孟子考義發》。三點睡，三更後成寐。

十三日

早飯後清理文件，習字一紙。圍棋一局。批校山谷詩甫一頁許，李筱泉來辭行，久談二時許。中飯後，雷鶴皋來一談。未刻出城送筱泉之行。歸，與眉生久談。閱本日文件。申正，寫對聯六付、挽幛一村。酉刻核批稿各簿。傍夕小睡。夜作詩十餘

句，《喜吳南屏至》七古一首作畢。二更三點睡，三更後成寐。

廿三日

早飯後清理文件。見客，坐見者二次。習字一紙，圍棋二局。許緣仲來久談。批校《山谷詩集》。中飯後閱本日文件。小睡片刻。王少岳等來一坐，李眉生、龐省三先後來一坐。酉刻核批稿各簿。傍夕小睡。夜核信稿七件。二更三點睡。

廿六日

早飯後清理文件。立見之客一次，坐見者一次。逆風漸息，開船行走，用小輪船拖帶。行八十里至東溝口停泊，待後至之船，約停一時許。習字一紙，批校山谷詩。與南屏久談。午正後開船。申刻至瓜洲口灣泊。坐見之客八次，立見者三次。酉刻，坐小船至六濠口瓜棧行走一次，即在程敬之處晚飯，往返約二十里，歸至瓜口已二更矣。閱《古文·氣勢之屬》。三點睡。

閏四月

初二日

早飯後，開四十里至常州府。見客，坐見者二次，立見者二次。上岸至劉開生家

一坐，旋即回船。開行數里，李質堂來迎接，與之久談。酉正二刻至羅山泊宿。坐見之客三次，立見者一次。是日將所抄五古曹、阮、陶、謝、鮑、謝六家，用《文選》本校對，約校三頁許。夜核批札稿簿。二更後倦甚，小睡。三點睡。是日燥熱異常，在船赤體不着衣，尚覺煩悶。午刻在常州驟雨，下半日燥熱未解，夜間大雨如注，頓覺涼爽，而又以麥收爲慮矣。

初七日

早飯後清理文件。見客，立見者一次，坐見者一次。辰初出城。將往游太湖，約丁中丞、李軍門及官紳等十餘人同游。定以初七日游木瀆、範墳等處，初八日游東西洞庭，閱視應設水師之所。開船行二十五里至木瀆，至許緣仲所寓葛園，一覽水石之勝。旋肩輿至靈巖山，登絕頂極覽。歸，至端園中飯。飯後，肩輿至天平山，步行登山。有下白雲、一綫天、中白雲、上白雲四名，實則從山脚至山頂，尚不及二里。余陟其巔，同行丁中丞等五人，俱中道而止。下山後，往謁範墳。西爲高義園，因範文正公之義田而立，純皇帝題扁及詩碑在焉。東爲範墳，文正公之高祖、唐麗水縣丞名□□之墓在焉。墓在太平山之左脅，山質皆石無土，群石矗立，土人名曰萬笏。朝天結穴

之處，有土方數十丈。其後山石壁立，亦不似吾鄉。堪輿家所稱老山抽嫩枝及落脉舉頂雲云者，不知何以貴盛久遠如此。旋肩輿行三里許，至無隱庵。蓋天平山爲最高之主峰，南向，其東貼近左脅爲範氏先墓。又東曰牛頭山，中有御路，爲純皇帝入幸範墳所由之道。又東迤邐而南，凡五峰，中一峰稍高者曰朱家山，即支硎山也。天平山之西，迤邐而南，凡四峰，其第三峰曰馬鞍山，與東邊之朱家山相對，即無隱庵之後山也。其第四峰較高，即靈巖山也。東西兩嶂，儼立相對。中間大壑相距二里許。西正三刻回木瀆登舟，往返約三十二三里。舟行將赴胥口，乃該處市鎮中間橋密而岸窄，余舟太大，節節逼隘，至一橋下，兩岸夾立石壁，良久不得過。更後，余登岸至許緣仲家住宿，而令各船次第倒行，退出三里之下。丁中丞及司道等來會，游興爲之頓減。因改議明日不復游洞庭東、西山，但至胥口一覽而已。一二更三點睡，久不成寐。

初八日

早，在許寓早飯。飯後，令人探水。與丁中丞、李質堂同赴胥口，查閱太湖形勝，同登香山之嘴。在胥口之西，其後爲小周山、大周山，最高者曰穹窿山。胥口之東曰清明山，亦曰胥山。其山脚拖入湖中者曰菱湖嘴。其迤而東北者曰堯峰。堯峰之尾

曰七子山。其與胥口相對橫亘於北者曰橫山。其內曰橫塘，此皆濱臨太湖之山也。其湖中之山，東洞庭距胥口約二十餘里，西洞庭距胥口約三十餘里。長沙山約距十里許，此目中所見者。其極北之馬迹山，極西之大雷、小雷，皆不見也。太湖若立水師，宜分三營。以一營駐東洞庭，轄蘇州吳、長、江、震四縣湖面。而西洞庭亦駐船數號，與浙會辦。以一營駐馬迹山，轄常州陰湖、無錫、宜興、荆溪四縣湖面。以一營駐大雷山，轄湖州長興、烏程兩縣湖面。閱畢，回至木瀆。中飯後開船，自木瀆回蘇州。丁中丞、李軍門在船久談。寫昨日日記。申正至蘇州灣，泊盤門之外。清理文件。閱邸報，余補武英殿大學士、朱鳳標補體仁閣大學士。隨從人等紛紛道賀，兩司及幕府等談最久，又坐見之客一次。傍夕登岸，在橋上久坐，與南屏等一談。丁中丞來道喜，即在橋上一談。歸船夜飯後，坐見之客二次。旋核批稿簿，至二更四點睡。

十一日

早飯後開船，行四十里。午初至新柵登岸，肩輿過洋涇濱、黃浦江等處，凡十八里許，至上海南門外新造鐵廠居住，未正到。在舟中與丁中丞等久談。清理文件，習字一紙，閱《文選·樂府》，批校鮑、謝等詩。小睡片刻。中飯後見客，坐見者八次，立見